



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Tamim Iqbal-i pa cricket asaya nungi anenba sangdongogo

Wagner tekolakba Prigozhin Russia nung lir



VOL. XX NO. 264 (ADOK 264) DIMAPUR ROGONÜ (FRIDAY)

CHITENI (JULY) 07, 2023

₹ 5.00

## UCC küboki Khristantem aser Tribal Areas tem maitdaksütsü asadanger: Amit Shah

**Dimapur, Chiteni/July 06 (TYO):** Government of Nagaland tenung nung Chief Minister Neiphiu Rio-i anir Speaker densema Cabinet ajunga, MPs ana aser Chief Secretary den sendaktem aliba ketdangsür temi New Delhi nung July 4 aser 5, 2023 anogotem Union Home Minister Amit Shah aser central sorkar ketdangsürtem ajurua liasü.

Minister, K. G. Kenye, Spokesman, Government of Nagaland ajanga sangdong ka nung ashiba agi, ENPO dak sendakba nung ken o jembishinüba tatemleni arur aser Concept renemtsü jembio saka ano merenem lir ta jangjaogo.

Iba yagi Entity tasen indang 'Ultimate Status and Structure' jangjatsüba Road-Map sayutetsü. Tang nungi tenzüka iba nung telok asemprong (GoI, Nagaland sorkar aser ENPO) alitsü aser tripartite Agreement tejangja aser tatembang agitsü asoshi inyakyim ajak nung state sorkar adentsü, ta sangdong ajanga ashi.

Uniform Civil Code dak sendakba nung tejashiba aser arendaka bilemba aser iba ozüng ajanga Nagaland ama Christian state ka nung Constitution indang Article 371 (A) ajanga Central Laws talenba küboki tamangba

yimsü temeden maitdaksütsü mela aliba nung timtem ajurutsü indang Union Home Minister nem angatetdakja ashi.

Iba dak sendakba nung 22nd Law Commissions Exercise küboki Khristan tem aser Tribal Areas kar maitdaksütsü Centre-i kanga temolung agüja asadanger, ta Union Minister Amit Shah-i jangja-jangja ashi. Ibai anisüngzük tulu lir, kechiaser iba yagi mangatetep adoktsü aliba nungi kumzüksü. Khristanpur ajunga tenung nung delegation ajanga pelaba lemsatepa liasü, ta sangdong ajanga ashi.

Naga Political Dialogue aser yimjung ken o jembishinüba koba tang tashi tatem kati maruteti ali, iba dak sendakba nung delegation ajanga Union Home Minister dang tekeratiba nung iba ken o angatetepa tembangtsü mepishia liasü, kechiaser iba ken o kuli tejangja makai mapang atsülanger aser nüburtemi mapang talangkabo tejangja memeteti melitetsü.

State nung iba ken o mechi terenlok maparen tajemba mekumdaksütsü mepishiba mapang, PDA sorkari tongtipang 'proposals' agüja aliba Centre nung anendaka aliba tekeraba nung bentetsü, ta Union Home Minister Amit Shah-i ashi.

## DC Chümoukedima-i July 4 nü lendong ajurua alirtem semdang



Deputy Commissioner, Chümoukedima, Abhinav Shivam IAS den DCP Chümoukedima, Munesh Payal IPS nungeri July 4, 2023 lendong nung yirur alirtem July 6, 2023 nü CISHR nung semdangba mapang tangokba noksa nung angur.

**Dimapur, Chiteni/July 06 (TYO):** Chümoukedima district kübok July 4, 2023 nikongdang long anenzüka aliba lendong nung sür aliba kinungertem aser yirur alirtem Brehostibar nikongdang Deputy Commissioner, Chümoukedima, Abhinav Shivam, IAS den DCP Chümoukedima, Munesh Payal, IPS aser Dobashi Chümoukedima, Vanthungo Kikon nunger temi semdanga liasü.

Iba lendong nung nisung ana asü.

Deputy Commissioner, Chümoukedima-i aniba telok yagi asür kinungertem den Razhaphe

Basa aser Lengrijan Dimapur nung ajurtepa asükhu lemsatep aser sen lakh pezü-zü indang ex-gratia cheque tem amokja liasü.

Parnokisa iba lendong nung yirur CIHSR nung temang anepalua munga alirtem (kinungtsü aser kinungbo) semdanga DC-i temolung süngzüksü o ashi aser parnok nema cheque agüja liasü.

Paisa nungdakra ano teyari agütsütsü ta ashi aser pa nem osang agütsütsü shia liasü. Deputy Commissioner-isa ano iba lendong nung yirua aliba nisung tasembuba July 7, 2023 nü semdangtsü.

## Nagaland nung JJM, SBM (G) mission takok ngua inyaksü meranger: Jacob Zhimomi



Northeast nung aliba state tem atema JJM aser SBM (G) indang review meeting ka Guwahati, Assam nung July 6, 2023 nü amendang tangokba noksa ka nung Nagaland PHED Minister Jacob Zhimomi angur.

**Kohima, Chiteni/July 06 (TYO):** North Eastern states tem nung Jal Jeevan Mission (JJM) & Swachh Bharat Mission (Grameen) inyakyim lepa reprangshiba senden ka Guwahati nung July 6, 2023 nü amendang Nagaland nungia dena liasü.

Nagaland nungi iba senden nung Public Health Engineering Department (PHED) Minister, Jacob Zhimomi-i anir E. Mhonbemo Patton, Principal Secretary to the Govt. of Nagaland; PHED, Chief Engineer & HoD, Repangyangba Longkumer aser T. Sangtam, Chief Engineer Sanitation & WSSO, Nagaland nungertem oa aden.

Iba senden nung Gajendra Singh Shekhawat, Union Minister, Ministry of Jal Shakti menden liasü.

Senden nung jembidang, JJM aser SBM (G) takok ngua renemtsü asoshi Nagaland state bendanga agütsür inyaker, ta Minister Zhimomi-i ashi.

JJM aser SBM (G) inyakyim lepa reprangshitsü asoshi North Eastern state tem nungi PHE/RWS Department indang minister in-charge tem den senden

ayongzükba atema pai Union Minister Gajendra Singh Shekhawat dang pelaba shisem.

"Iba ya ajanga JJM aser SBM (G) mapa takok ngua tembangtsü asoshi tasa yangluba aser ajangshibatem onoki lemsateptsü maongka agütsür," ta pai ashi.

Linük nung danga state tem ama Nagaland nunga JJM ya 2019-20 nung tenzük. Nagaland nung iba mission tetenzüklen kera inyaksü mapang agia liasü. Tangbo tekeraba nung inyakyonga aor aser project agizüka aser work order agütsütsü asoshi inyakyim nung mapang tatsüba agir, ta Zhimomi-i ashi.

Nagaland nung yimtsüngtem nung aliba kilen 3,69,295 nungi tang kilen 2,65,928 - shilem 72.01 - nung Functional Household Tap Connection (FHTC) agüja lir.

Tanünga kilen 1,03,367 nem December 2023 tashinung tajemtsü tzü tajung agütsütsü state sentong lir.

Har Ghar Jal reported villages 472 nungi 225 nem state-i certified sütsüogo, koba shilem 47.67 alitsü. Tanünga atema certification maparen tang teinyakdak lir, ta pai ashi.

Kiphire Aspirational/Mission Utkarsh district nung kilen 14,991 aliba nungi state ajanga kilen 12,842 (shilem 85.67) nung 'household tap connections' agütsüogo.

Tanünga 2,149 nungi Rural Development Department (RDD) ajanga inyakba 15 FC award portion ya 792 alitsü.

Iba maparen December 2023 tashinung renemtsü atema onoki RDD den amteper inyaker, ta Nagaland PHED minister-i ashi.

Rural Development Department ajanga 15th Finance Commission grant kübok Schools, Anganwadi centres aser danga Public Institutions nung inyaker.

North East nung tenem aliba danga state tem nung ama Nagaland nung yimtsüng timba tenem kolak nung tzü sources nungi pilar lir, anungji pipe water supply scheme inyaksü asoshi tayongzükba jenti lir aser iba yongji mapa kera meinyakteter, ta pai ashi.

Iba den külemi nisung-i yanguba mesüra alimar yimya ajanga tenem kolak nung aliba water sources ajema akumba Nagaland nung kanga bulua lir.

(Maneni tapak 2 nung...)

## NJCF kübok lenirtemi Manipur semdang

**Dimapur, Chiteni/July 06 (TYO):** Tang asen puti otsü nung tejashi aser temolung shirangba mapang Nagaland Joint Christian Forum temoatsü kübok Nagaland nungi nisung kari Manipur state yimtiba Imphal semdanga liasü.

Asenok tesendaktep tajung aliba, azüdokshi tensa tamajungba akumba tatem kumdaksütsü asoshi nendaka inyakba sayutsü aser Manipur nüburtem den tejashi lemsateptsü nükjidong nung Manipur semdang, ta sangdong ka nung Rev. Dr. N. Papino, Vice President, Nagaland Joint

Christian Forum; Rev. Dr. Vevo Phesao, Vice President, Fellowship of Naga Baptist Churches

Kohima aser Rev. Dr. Wati Aier, Convenor, Forum for Naga Reconciliation (FNR) nunger temi ashi.

Tanen makai tensa tamajungba akumba ajanga Manipur nung kidanger, tembar aser kin balala tsüngta telemsa adokdaksür.

Azüdokshi ajanga azüdokshi ang tali adokdaksür ta asenoki kuli tejangja ngua lir aser ibaji ajanga meimchir ang tali tim atemer, kati ka den aser asen

müketa alirtem den tesendaktep samatsür. Kidanger ama Manipur nung aliba nüburtem dang yimjung nem maongka agütsütsü ayongzükter aser tasü ita iba azüdokshi tatem kati arudaksütsü ajungshir, ta sangdong ajanga ashi.

Tang aser tarutsü putu asoshi nenok külemi jajatsü aser kati ka den jembishinüba nüburtem taneptsü angutsüsa inyaksü ayongzükter. Tatok agütsütepa tanaben lungjemshitsü aser yimjung nung asenoki tamang akar, aser iba tangatetba nung onoki semdang, ta sangdong ajanga ashi.

# Imphal nung injang tazüing juli ana apu

**Imphal, Chiteni/July 6 (Agencies):** Imphal nung jananongna belenshiba tata gari ka nung injang tazüing (empty bullet shells) juli ana Manipur Police-i Brehostibarnü ngutetogo.

Itangitertem nungi osang tejangja angazükba sülen Imphal West District police-i Brehostibarnü 1 ako nung Imphal kübok Road crossing point meita ao.

Meita aoba mapang police-i Imphal kübok Moidangpok tesem nung arua aliba tata gari ka nung injang tazüing julu ana

sünga bener lia ngutet, ta official sangdong ka ajanga metetdaksü.

Temetetsü kaji Uripok, Imphal West nungi local club volunteer tem aser tetsür lokti tentet balala shirnoki parnok mapa kanga nendanga agüja inyakdar parnoki Brehostibarnü 1 ako shi nung iba tata gari sota liasü.

Gari sota bushisüingdangba mapang parnoki merang insang balala den prangbong balala nung amshiba injang tazüing aika nguteta liasü. Iba sülen injang tazüingtem ya Imphal West District Police nem

bendanga agütsüogo.

Iba tatalokba dak sendakba nung ken o ka benokogo, ta kasa sangdong ajanga metetdaksü.

Meitei aser Kuki nungter tsüingda mangatettep adoker aliba mapang ka nung tetsürtem aser club volunteer temi state kübok tesem balala kanga junga meita atadar. Iba mepetmesü nung tang tashi nung nisung 120 dak tema taküm samaogo aser nisung 60,000 dak tema pei ki toktsür jenshia aoba den ki 5,000 dak tema raksatsüogo.

# Mokokchung police-i tesemepba mozü shibelener apu

**Dimapur, Chiteni/July 6 (TYO):** Temesepba mozü anema rara nung shilem ka ama Mokokchung police-i July 1 nü tesem kar meita aoba mapang Ungma yimtsüing nungi asür Sendongyanger'er jabaso Lanutoshi (küm 33) MMC Complex Sumo Stand nung puogo. Sumo driver ka ket nungi parcel ka meshiba anguba sülen pa pua liasü.

Bushisüingdangba mapang plastic soap case ka nung Brown Sugar/Heroin asütsü ta temulung melemibilemba temesepba mozü seper lia pa ket nungi apu. Lanutoshi ya DEF Mokokchung nung constable ka lir aser Brown Sugar/Heroin asütsü ta

temulung melemibilemba temesepba mozü ya gram 09.27 shi liasü.

Police-i maneni bushisüingdangba sülen supplier tem jangja aküm aser July 5 nü Dimapur nung meita aoba sentong ka ayongzüka agi aser nisung ana pua liasü. Tena ya ka Tonjoy Poumai-Senapati, Manipur yimtsüing nungi Naga United Village Chumukidema nung alir Dvio Vmai Poumai'er jabaso Moameren Vmai (küm 40) aser Chingme Khullem/Raveme District Senapati, Manipur yimtsüing nungi Rangailong Colony Burma Camp, Dimapur nung alir Rhinyi Throonzho'er jabaso Kilonser NSCN-K (NIKI) Buni Throzho

(küm 47) ta jangjaogo.

Maneni tena ket nungi .22 calibre Pen pistol ka den 22 calibre injang trok nguteta liasü. Iba dak ajemdaker ken o maneni bushisüingdangtsü atema Mkg PS- I nung ken o ka benokogo.

Ken o dak sendakba nung temesepba mozü anema raratsü asoshi nüburttem dang teka amteper inyaksangshitsü atema Mokokchung Police-i mepeshia metetdaksüogo. Parnokisa, temesepba mozü achiba aser shibelener nung densema alirtem anema Narcotic and Psychotropic Substances (NDPS) Act kübok provision tapet dak ajemdaker jenjang tapet agütsü ta metetdaksüogo.

# Nagaland nung JJM, SBM (G) mission...

(TAPAK1NUNGI...)

JJM ajanga tajemtsü tzü sources aser tzü agütsütsü ki o jen yangluba nung Nagaland ama tenem aliba state tem nung tetsükdaksü lir, ta minister-i ashi.

"Sustainability of Drinking Water Sources" omen nung ajemdaker Jal Shakti Abhiyan - Catch the Rain 2023 ya Central sorkari mapang shidak nung inyakba sentong ka lir aser iba yagi sentong balala ajanga 'source sustainability' tebilemstü samadaksütsü, ta pai ashi.

"Ajisiüaka mapa tebenja aliba ajanga atajemtsü tzü source teti asoshi amshitetsü atema Ministry of Jal Shakti kübok Mission mode nung Springshed Management atema 'comprehensive plan' ka tenzü nung ajungtsü," ta pai ashi.

State nung Aadhaar registration ya shilem 61.08 dang lir, anungji state nung FHTC coverage indang osang mapang shidak nung agütsüba nung timtem ajurutsü akok, ta pai ashi.

Tajemtsü tzü tendanga

asadangtsü tongtipang ta ajiteta Nagaland state kübok District Laboratories 11 aser Dimapur nung State Laboratory ka amenoka lir, ta pai iba senden nung metetdaksü.

2023-24 mapang laboratory nung aser Field Testing Kit (FTK) amshia yimtsüing 1449 nung tzü tendangba 12,127 ben agia liasü.

Tzü sample 112 menener ngutetba asoshi nüngdakba mera agiogo.

Yimtsüing 1472 nung department ajanga FTK amshia tzü ajung-majung tendangtsü asoshi tetsür 7,360 nem training agütsüogo.

JJM guidelines nung aliba ama Department ajanga district ajanga nung TPIAs (Third party implementing agency) shimogo aser TPIAs ajanga verification aser certification agütsüba sülen ang senotsü agütsü. Mapa junga inyakdaksütsü mechi yamai inyak, ta Minister Jacob Zhimomi-i ashi.

"Nübu peria maliba ajanga

mapa meilongi inyaker, anungji Skill Development nung temolung agütsür. 2022-23 tashinung onoki trades balala nung nisung 2,691 nem training agütsüogo aser nisung 3096 nem multiskill training agütsütsü nükjidong tulu lir aser meyi aser alu nung tsük yokba sülen mapa inyak tenzütsü," ta pai ashi.

SBM (G) Phase-II kübok IHHL (Individual Household Latrine) yangluba maparen tang teinuakdak lir aser ibai Nagaland ama tribal state asoshi kanga tongtipang lir, kong mapang shia yimtsüing tasen kuma aor, ta Zhimomi-i ashi.

Projected IHHL 4,322 nungi taküm 1256 renemogo aser tanüingba ya temolung agüja inyaksü, ta ashi.

State nung yimtsüing 1425 nungi tanü tashinung yimtsüing 430 nung ODF plus sangdongogo aser Rural Development Department teyari nung tang financial year mapang AIP nung aliba ama yimtsüing 710 awajemtsü sentong lir.



Tasoba : 10/01/1943 - Tasüba : 01/07/2023

## ASÜR T. MAR JAMIR, WAMEKEN

Joko iba lima-i tanaben kodanga meyipa marutsüba Kotak lima tepeladak-i ogo.

Pa tatsüka shirangba mapang nungi tanü tashi lokti balala, kija aser kibong ajaki, sarasadem, shisatsü, nübo, aser rongsen tulu agi ozü nungeta yariogo, nenok ajak dang ozü-i kangasa pelaba lemsateper.

Asen Tulusang Tsüingrem-i ajak molamoshia moajangma. Amen

- Temeim Kinungtsü aser Kinungertem

# Sen crore ka alang temesepba mozü apu



**Dimapur, Chiteni/July 6 (TYO):** Temesepba mozü shibelener anema jenjang agiba mapang Kohima police-i July 1 aser 3 nü meita aoba mapang sen 1.11 crore alang heroin gram 1060 puogo.

Temesepba mozütem ya soap cases (91) nung seper jang juli aser passenger tem anemba menden telung nung meima

bener lia nguteta liasü.

Iba dak sendakba nung Senapati, Manipur nung alir arishi küm 22 tain Hrivülo aser Kangpokpi, Manipur nung alir arishi küm 52 tain Kimhoi Kipgen na puogo.

Ken o maneni bushisüingdangtsü atema aija alisang ana anema South Police Station nung ken o benokogo.

# NSCN/GPRN-i Tuluni benjung salem lemsatep

**Dimapur, Chiteni/July 6 (TYO):** NSCN/GPRN-i sangdong ka ajanga Sumi nungertem den 'Tuluni benjung salem lemsatepogo.

Iba benjung ya anogo asem amunger aser July 8 nü tembangtsü.

Tuluni benjung dang ya "Anni" ta-a ajar koba ajanga temaotsü tsüingüm mongpu aser lokti longjemba mapang ta sayur.

Benjung mapang sempet

balala lemsateper aser kinungertem tsüingda chiyong benjung ayongzüka chiyongteper.

Sumi nungertem ya tasü tait aser temulung tulu saka tetsürtem kanga aküm tsübua amshiba ki ka ta ajaki meteta lir aser Sumi nungertem lenla ajak nung renlokyonga aotsü ta NSCN-i temulung lema bilemer, ta NSCN/GPRN (Akato Chopi) MIP sangdong ajanga metetdaksü.

# Mokokchung DPDB senden July 14 nü amentsü

**Dimapur, Chiteni/July 6 (TYO):** Deputy Commissioner (DC) aser nung amentsü ta Vice Chairman District Planning and Development (DPDB) Mokokchung,

Thsuvisie Poji-i sangdong ka ajanga, ita shia amenba DPDB senden July 14 nü 11:00 ako

nungi tenzüka DC indang Conference Hall, Mokokchung nung amentsü ta metetdaksüogo.

Iba dak sendakba nung DC-isa, züingsem ajak dang senden nung jangrabangra arua shilemagütsü asoshi mepeshia metetdaksüogo.



Naga Students' Union Dehradun Sports aser Literary Meet koba 28/08/2023 nungi 30/06/2023 tashi agiogo, iba ajanga wadang balala nungi nüburttem aika longjemdaksüogo aser asen lokti yongtsü nung telongjem aser kati ka taoba ta züingshitepba tali akangshidaktsüogo.

# Haryana sorkari amitsürtem nem ita shia pension 2,750 agütsütsü

**New Delhi, July 06 (Agencies):** Brihostibarnü Haryana sorkari, income kanga ajema angur arrshi küm 45 nungi 60 tsüngdapur kibong makümertem nem ita shia pension sen 2,750 agütsütsü aser amitsürtem nem-a kasa scheme ka agütsütsü, ta metetdaksü.

Haryana state sorkari income ajema angur arrshi küm 60 ser temapurtem nembo ita shia pension sen agüja arudar.

Brihostibarnü Chief Minister, Manohar Lal Khattar-i, küm ka nung income sen lakh 1.80 tekübok angur aser kibong mekümi alir arrshi küm 45-60 tsüngdapurtem nem ita shia pension sen 2,750 agütsütsü, ta metetdaksü.

Iba denji kasa küm ka nung income sen lakh 3 tekübok angur amitsür arrshi küm 40-60 tsüngdapurtem nem ita shia sen 2,750 agütsütsü, ta paisa metetdaksü.

Kibong makümertem aser amitsürtem nem ita shia pension

agütsüba ajanga küm shia state senpong nungi sen crore 240 shi indoktsü.

Khattar-i, state nung income ajema angur arrshi küm 45-60 kibong makümer 65,000 lir aser arrshi küm 40-60 tsüngdapur amitsür 5,687 lir, ta metetdaksü.

"Income kanga ajema angurtemi taküm terabo akhüm keta litettsü atema onoki iba telemetba agi," ta chief minister-i ashi.

Arrshi küm 60 atongba sülen item scheme nungi tajangzük angurtemi maneni old age pension angutsü, ta paisa metetdaksü.

Khattar-i, state tesem ajaklen colony aika regularize sütsütsü atema urban local bodies aser town country planning department-i inyakdar, ta ashi.

"Item colony regularize sütsütsü atema ozüngtem aser mapatongtem yanglushitsüsa akümer. Colony 2,000 shi regularize sütsütsü atema maparen teinyakdak lir," ta paisa shisem.

# India nunger mission Chandrayaan-3 July 14 nü khakettsütsü



July 06, 2023 nü Sriharikota nung ISRO indang LVM3 nung Chandrayaan-3 khakettsütsü atema Satish Dhawan Space Station nung aliba launch pad nung renema yua aliba noksa nung angur.

**Bengaluru, July 06 (Agencies):** Brihostibarnü ISRO-i, India nunger ita-i yokba mission Chandrayaan-3 July 14 nü nikongdang 2:35 ako nung Sriharikota nung aliba Satish Dhawan Space Station nungi khakettsütsü, ta metetdaksü.

Isro chairman, S Somanath-i, "Iba anogo [July 14] nungji khakettsüra August ita tatembanglen tashi nungbo ita atongsü. August 23 mesüra 24 nü ita nung anenzüktsü, kechiyong onoki ita aser alima na indanga aliba mezüngbuba anogo nung anenzükdaksüner,

ibaji ajanga mapa inyaktsü atema onoki anogo 15 angutsü. Anogo ana nungji manenzükttetra onoki ano ita ka shi atar sülen September ita nung ang anenzükdaksütsüsa akümtsü," ta metetdaksü.

2019 küm Chandrayaan-2 khaketja liasü aser September ita nung ita nung anenzüktsü merandang tamakok angu. Chandrayaan-2 ama masü saka Chandrayan 3 nungbo orbiter den lander ka aser rover ka alitsü, iba spacecraft nung modules asem- Propulsion, lander aser rover alitsü.

# Congress-i Gehlot aser Pilot tsüngda mangatetep bentettsüogo



July 06, 2023 nü New Delhi nung aliba AICC office nung Congress Tir, Mallikarjun Kharge-i party lenir ana- Rahul Gandhi aser Sachin Pilot na den senden amendang tangokba noksa nung angur.

**New Delhi, July 06 (Agencies):** Kobi melii Rajasthan nung assembly election agitsü lia Ashok Gehlot aser Sachin Pilot na tsüngda mangatetep bentettsütsü atema Brihostibarnü New Delhi nung Congress Tir, Mallikarjun Kharge aser taoba mapang party Tir Rahul Gandhi na densema lenirtemi senden ka ayongzüka amen.

Iba senden nungjisa Rajasthan election atema asalentong yangluba den külemi election atema terenemshiba jenjang asadang.

Rajasthan nung mapang talangka nungi Chief Minister, Ashok Gehlot aser party lenir,

Sachin Pilot na tsüngda mangatetep aliba ajanga party telung nung telemsa adoka lir.

New Delhi nung aliba AICC office nung senden tembangba sülen Sachin Pilot aser Ashok Gehlot nati külem sangdong ka ajanga, party lenirtem longjemer taruba assembly elections nung tokteptsü, ta metetdaksü.

Osangbener den jembidang Pilot-i, party Tiri pa dang tesüiba mapang tokjang aser tarutsü nung ang rangoker inyakang ta shiogo, aser party bangdak-i tuyubaji pai agizüktsü, ta metetdaksü.

Osang angazükba agi, state party organization nung Pilot nem menden tuluba

lemzüktsütsüa akok. Iba senden nung jembidang Rahul Gandhi-i, taruba assembly election nung Congress-i longjemer toktepra BJP tamakok ngudaktsütsü, ta ashi.

Iba senden nung adenertemji Congress Tir Mallikarjun Kharge, Rahul Gandhi, Rajasthan nung AICC in-charge Sukhjinder Randhawa, Rajasthan nungi cabinet minister tem aser Sachin Pilot den Chief Minister Ashok Gehlot nunger liasü.

Kharge-i, Rajasthan nung lenla ajak tsütsü terenlok lenmang nung jajadar aser party longjemer taruba election toktepra takok angutsü, ta metetdaksü.

# NCP Tir Sharad Pawar-i Praful Patel den tangartem party nungi jendok

**New Delhi, July 06 (Agencies):** Brihostibarnü New Delhi nung senden ka mena Sharad Pawar-i aniba NCP-i Ajit Pawar-i aniba telok anema bangzüng ka renemogo.

Sharad Pawar telokisa, Praful Patel, Sunil Tatkare aser SR Kohli nungeri Ajit Pawar pusemba atema par asemprong NCP nungi jendokogo.

Tamalen Ajit Pawar-i aniba teloki Tatkare, Maharashtra unit Tir shim aser Jayant Patil party nungi jendoka liasü.

Senden tembangba sülen osangbenertem den jembidang Sharad Pawar-i 'Ni NCP Tir,' ta metetdaksü.

June 30 nü Ajit Pawar-i Election Commission dangi züluba shidi ka nung pa NCP Tir, ta shia lir; iba sülen anogo ana dang lirbo pai Maharashtra sorkar nung aden.

Osangbenertem den jembidang Sharad Pawar-isa, par teloki kechisa tashitsü lir, item ajakji Election Commission dang ashitsü, ta metetdaksü.

"Tanü senden amenba ajanga onok tashi itshidaktsüogo. Ni NCP Tir," ta pai ashi. Par adianu chir, Ajit Pawar-i pa arrshi küm nung kanga tambur ta jembiba dak sendakba nung pai, ni küm 82 süaka 92 süaka ni tang tashi

tashi itta lir, ta ashi. Ano külen NCP lenir, PC Chacko-i, Sharad Pawar-i aniba NCP tang tashi itta lir aser parnok ajak Sharad Pawar lenisüba kübok lir, ta ashi.

"Sharad Pawar national Tir shima liasü, anungji tangar kari parnok national Tir ta jemiaka onoki ibaji süoki ia magir," ta Chacko-i metetdaksü.

Taoba hopta Ajit Pawar den NCP MLA 8-i Sharad Pawar-i aniba party toktsür Maharashtra nung Eknath Shinde-i aniba sorkar nung aden.

Ajit Pawar-i Deputy chief minister tenangzükba agi aser tanungba MLA temi minister tenangzükba agia liasü.



July 06, 2023 nü New Delhi nung Union Finance Minister, Nirmala Sitharaman-i Public Sector Banks (PSBs) nung ketdangsertem den senden amendang tangokba noksa nung angur.



# TIR YIMYIM

## YIMOBILEM (EDITORIAL)

DIMAPUR ROGONÜ, CHITENI (JULY) 07, 2023

### Asen lu

**T**anü asüng shishilembadak aonsutsü nung jenjang kanga tuogo. Iba jagi asenok kibong shia sen talila endoktsüsa akümer mesüra aon aser lon akhidang dang nungi tajemba achitsüsa adoktsü. Aji oda, mersü tajem seret nung sen noklang ana aser bengana seret nung sen noklangka aser tanga süngolemba aser aonsutsüa sen 50 teküpbok jenjangbo maka kümogo. Iba tensa tia nung kibong nung nisung ka ita sen achiba kisüng sen agibo akhi ama kinunger ajak metsü mersü agi jeta soruchiokabo mechiyongdaksütettsü. Asenok Naga nunger aser talisa Aortem akhi mapang tekong nung tsük lu yima aliba ajungbena ka dang anenadok aser aluyimertema masü aser tanga mapa inyakertema masü ta peisasa-a pei kechi mapa inyaka taküm aliar mejangjateti kumadok. Aji oda, asenok tanü tebok sünga aliba yabo asenok lu nungi züsentetba agi masü saka center government-i relief jang jenjang dalang agi dang masü saka angati dena agütsüba agi iba chi denji ita sen agi aonsutsü alia chiyongba ajanga tango sashia alirba dang lir. Ajisüaka, relief jang aser ita sen dak nendaka alir asenok taküm aser kibongtem ya ak kidang puoker mesüdaksüba ama tangar nem mesüdaksürtem lir, anungji kiburi chi magütsüra kongraseta asütsüba dak alaka peisasabo taküm melitettsü. Tangarbo mapa inyakba nung nüma atanger (dignity of labour) saka asenokbo mapa meinyakba nungang nüma atanger. Tangarbo peisasa inyaker chiyongba nung nüma atanger saka asenokbo relief jang chiyonga kazüba nungang nümadanga alir. Iba taküm tia ya kodang jungjunga bilemdangdir, relief jang lema chiyongdaksür kazüdaksüba ya kaini aser drugs chidaksür kecha tebilemsü maka kazüdaksüba den kasa lir. Iba jagi asenoki tsük lua mayimer kechiyong relief jang angati angur aser aonsutsü lua mayimer kechiyong asenok asoshi tsümartemi peria ayimer aser parnok dang nungi jenjang dalang agi alitsü asoshi asenok ita sen achir, anungji kechi shisabolutsü ali ? Aji oda, asenok asentzü sendoka alua mayimer aser chibo relief jang chiyonger ta asüba agi ita sen ajak aonsutsü aliba nung endoker temang nung tashidak adoka mapang tatsüka alima nung mapa kecha meinyak monga kazür piladoker. Tanü alima nung asenok yamaji alir teimba kümogo. Iba tiaji kodang bilemdangdir taoksatsüka aser alima nung alia meshizüka ta asenokia rajema arutsü. Tangar tsük lu ayimba ya tzünglu aru ataa lir, kodang tzünglu arua ali anükanüka metenjemdir, idangji aliji alu alaba nashi mesüra gari amshia angensar mou (tsük dong) atemer aser ita ishika tsüngda tsük ruzüka agir. Aonsutsü lua yamaji, manü aser mendi lua yamaji ayimer. Asenoka tekong lu ayimba kenyongi mayim toktsütsü melen aluyimba yimya aser aluyimdang amshiba osettemang melen nungbo koda jungla ta bilemer. Ajisüaka, asenoki tekong lu nung anü pua aser tzünglu ajaa alulem mertsüng amer inyakba nung tajangzük maliba agi odang toktsü aser iba dang nungi tajungba yimya nung aluyimtsübaji tebilema meblem aser tesayua junga mesayu. Ajisüaka, tangar tsük lu dang masü saka aonsutsü lu ayimba yimya reprangdangra, parnoki anü tatsük makümdang anepdang aser nikongdang mesüra tsünglu marudang inyaker. Iba jagi asenok ajak peritsüsa yokteter. Aji oda, asenokia tangar amaji alu ayim nungbo, tang ama tsüngsang majungba agi mesüra tzü metsüngba agi tanga len nungi aonsutsü peria bener marutetbaji asenok asoshibo tajangzük talila anguba temoatsü mapangang ka süla. Alu ayimba mapa nung ya temang raksaa inyaksü kecha mali saka anepdang aser nikongdang asentzü sentoka inyakba agi temangang tajungba akümer. Alu ayimba nung taaktsü mali saka tepelatsü aser meraket lir. Pei lu nung züsentetba chiyongbaji vitamin saka relief jang mesüra dokan nung tsümar jang aser aonsutsü alia achibaji tashidak alia achiba den kasa lir. Atangji, asenok inyaknüaka nübo mali, anungji yimnüaka alu tulukabo meyimtettsü, ajisüaka asena asen peribo angutsüsa tsük lu tilaka den aonsutsü lu tilaka yimtetra, iba jagi senotsü aser asen temang kümzükba dang masü saka tang ama aonsutsü nung jenjang atuba mapanga kecha balaka timtem majurutsü.

## OLEMSABANG



### CLARK THEOLOGICAL COLLEGE

Affiliated to the Senate of Serampore College (University)  
 Founded by Ao Baptist Arogo Mungdang (ABAM) - 1972  
 Co-sponsored by Nagaland Baptist Church Council & the Associations  
 Regd. with Nagaland Govt. Under Society Act No RS 37 dated Feb. 18, 1974

### CLARK THEOLOGICAL COLLEGE SUNDAY JULY 9, 2023

*Temeim Sannüker aser amangbapurtem,*

Tamasa Yisu Khrista temeim salem Clark Theological College (CTC) ajanga amangbapurtem ajak dangi abener. CTC 1972 küm lapoker taküm agi küm 51 buba tashi Tsüngremi ajungketa moatsüba aser takok ngua anir aruba ya arogotem, kija, kibongtem, ana aser talang nung aliba amangbapurtem sarasadem aser teyaritep ajanga ta meteta ajak dang pelaba metetdaksür aser Tsüngrem tenüng asanger. Taküm CTC Sunday July 9, 2023 nung amongtsü asoshi sarasadema arudaki. Aser iba anogo nung sannüker aser tenzükertemi anir pei arogo nung sentong tajung yanglua CTC ministry asoshi sarasademba den külemi mulungso tenla tajung bendentsütsü asoshi maneni mepishir.

#### Sarasadem nung Bilemtettsü Onüktem:

1. Tsüngrem nem tenüngsang agütsüba:
  - a) CTC Golden Jubilee sentong, November 10, 2022 anogo nung takok tulu aser temoatsümanung mongtetdaksüba asoshi Tsüngrem nem tenüngsang agütsüdi.
  - b) Arogo, lokti balala, kija aser kibongtemi mulungsoa tenlaba ajanga, Mary Mead Girls Hostel New Building 3rd Floor aser Multi-Complex Building First Floor (Alempang Baptist Arogo Floor) mapatem takok ngua tembangogo. Iba temoatsü asoshi tenüngsang agütsüdi.
2. CTC Board of Governors, Patrons, Life Members, Founding Members, Co-Sponsors, Co-Operating Churches, Trust, Award aser Scholarship Sponsors taküm aser kibongtem asoshi sarasademdi.
3. CTC nung Faculty 26 aser Staff 30 lir, parnok taküm, wadang aser kibongtem asoshi sarasademjangma.
4. Taküm (2023-2024) Academic Session asoshi student's ajak agi 453 registered süa lir, parnok taküm aser tazüngba wadang asoshi sarademjangma.
5. Taoba Academic Session (2022-2023) nung students 108 graduate süogo, parnok tenzüka wadang balala asoshi sarasademjangma.
6. CTC Alumni ajak agi 2,256 kümogo, parnok tenzüka wadang balala aser kibongtem asoshi sarasademjangma.
7. CTC nung Centre 4 (pezü) amenoka lir- Clark Centre for Leadership Development (CCLD), Clark Centre for Peace Research and Action (CCPRA), Clark Communication and Cultural Research Centre (CCCRC), aser Clark Centre for North East India Studies (CCNEIS). Item centretem ajanga shisatsü tarok bushir aika ajangzükba den külemi yimjung asoshi sentong, shisa tokten, aser kakat balala adoka arutar. Item Centretem asoshi sarasademjangma.
8. Kaketnang (separate Library) ki ka asütsü asoshi sarasadema aliba mapang nung, ABAM-i Sesquicentennial aser CTC Golden Jubilee amongba tenüng nung ABAM-i iba ki ya sütsütsü asoshi telemtetba tajung agiba asoshi pelar aser Tsüngrem tenüng asanger. Iba Project asoshi Committee membentemi anir maparan tenzüka odar. Parnok taküm aser iba project mapa takok ngua inyaka aotsü asoshi sarasademtsüdi.
9. CTC Multi-Complex Building 2nd Floor (Auditorium) tenzüka asütsü asoshi maparen inyakyonga arudar. Aser iba project asoshi Clark Theological College Alumni Association ajanga seed money ` 50,00,000 (rupees fifty lakhs) agütsütsü asoshi fund raise süa arudaki. Parnok inyakba wadang aser iba project asoshi Tsüngremer temoatsü meshia sarasademjangma.
10. Clark Centre for Leadership Development (CCLD) 2nd Floor asütsü asoshi sen teyari lenmang lapokjang ta sarasademdi.

Tsüngremi amangbapurtem ajak maneni moajangma.

~ Prof. Rev. Dr. A. Temjen Jamir  
 Principal, CTC Date: July 3, 2023

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Manipur nung Yimjung asoshi Candle Light Vigil sentong ayonger



# ABAM Candle Light Vigil

JULY 9, 2023 | 7 PM | MOKOKCHUNG TOWN  
**PRAYER FOR PEACE**  
IN MANIPUR

Impur, July 06 (TYO): ABAM ajanga July 9, 2023 aonung 7:00 ako nungi 8:00 ako tashi Imlong Place, Mokokchung Town nung asen kiyonger Manipur nung lendong atalokba asoshi tejashi aser tokrong lemsaba temaitsü den külemi Yimjung jazüka sarasadem sentong ka "Candle Light Vigil" ayonga agitsü, ta Brihostibarnü ABAM Executive Secretary, Rev. Dr. Mar Pongener-i sangdong ka ajanga metetdaksü.

Iba sentong nung Mokokchung temeket Arogotem, Mokokchung Town nung telen balala ajak aser nütsüng nübur temulunger ajak arua adentsü jaoker; iba sentong atema amangbapurtem ajaki sarasadema atadi, ta kasa sangdong ajanga mepishia metetdaksü.

## WCC-i Israel nung sepaitemi tashi tali amshiba anentsü ayongzük

**July 06, 2023:** World Council of Churches (WCC) General Secretary, Rev. Prof Dr Jerry Pillay-i Jenin nung Israel sepaitemi tashi tali amshiba anentsü ayongzük.

Sepaitemi tashi tali amshibaji WCC-i aitsür aser West Bank nung ozüing alema inyakba mapatem ajak anentsü ayongzük, ta WCC-i metetdaksü.

July 5 nü osangbener den jembidang Pillay-i, "Israel sepaitemi Jenin Refugee

Camp amakdang nisung 12 asü, nisung 120 yiru aser nisung meyrjang aika jenshiogo. Iba dak alia Jenin nung Tenla ki-a raksatsüogo," ta metetdaksü.

Pillay-i ashiba agi, Jenin nung Orthodox aser Latin Arogotemi refugee camp nungi kar atema kishi lapoka jenokdaksüogo, ajisüaka WCC-i refugee camp nung alirtem atema shisabulutsür, kechiyong iba

camp nung refugee 18,000 shi lir.

"Sepaitemi maneni amakba ajanga tensa ano tamajungba dang akümtsü, ta WCC-i shisabulua bilemtsür," ta WCC-isa metetdaksü.

Pillay-isa, "WCC-i international humanitarian organisations dang Jenin Refugee Camp nung alirtem taküm taneben asentenshia yangertsü aser akhümketa litettsü atema yariang ya mepishir," ta metetdaksü.

## ANOGO ABEN TSÜNGREM DEN

### Senti tasüba (T.ken 116:12-19)

Nisung ishikati dang tasüba indang jembiner. Tekong 15 nung ashir, "Kibuba matsüngdang Pa temeshipur asüba senti lir." Iba ashiba o ya aiben tai angatetter, anungji asenoki iba o ya shisadangdi.

Tasübaji temenen temerenshi lir; Tsüngremi taküm lidaktsür. Tsüngremi mezüing teyangluba nung temenen mali asü saka kodang nisungi temenen mena, tasüba aru. Tang iba jagi chuba ama yimsü asür. "Aser kechi koda nisung ken dang asütsüla, aji sür kelen o bendangba arur" (Ibri 9:27). Atangji kodang meküzmükba pur kar asür Tsüngremi mepelar kechiaser parnok Khrista malidak teti tatem maka tammang daki aor ta Pai metet (Ez.18:23). Mesüra Pa pur asüadang Pai pelar asü? Yisui Lazar leper kümbang nung noktak aser ajeb (Yn.11:35).

Tsüngrem chirtem asübaji Pa tsüngdang senti lir aser ibaji lendong ka masü. Ken zülur tasür dang liasü, "Tasüba lisü agi ni mesangbangogo, aser Sheol tekangshi agi kü dak tongogo, ni timtem aser tejashi nguogo" (t.3). Pa tasür liasü aser pai Kibuba dang ayimten aser pa dang langzü, "Na asübaji kü dang kanga senti lir, ni na lendong ajanga mesüdaktsütsü." Sür shirnok Kibuba den alitsü kidangi aor parnok asübaji lendong masü. Asenok mapa merenem tashi asenok masütsü. Aser ibaji tasü aitsü o lir. Iba lima nung asenok dangi arutsüba lendong jenti lir saka Tsüngremi ashir, "Na asütsü melatsüji ni asoshi kanga senti lir." Tamanger ka asübaji kanga senti kechiaser asenok nem teti taküm agütsütsü asoshi Yisui kangki nung asen menen ajak aben.

Ne taküm tasüba lendong ka masü. Na masodang Tsüngremi ne taküm indang ajak metetta liasü ta temulung süngzükang. Na Pa asoshi inyaktsü mapa kar, aser kodang aji renemdir Pai na Pa den alitsü kidangi anir aotsü.

## ABAM den Aor Laishir aser Tesayurtem telungjem sentong agi



**Impur, July 06 (TYO):** ABAM den Aor Laishir aser Tesayurtem Telungjem sentong "Tesendaktep Akhangshiba" Omen nung Clark Theological College (CTC) aser Nagaland Bible College (NBC) Mokokchung den CTC nung July 6, 2023 anogo nung kanga temoatsü ngua agiogo, ta ABAM Executive Secretary, Rev. Dr. Mar Pongener-i sangdong ka nung metetdaksü.

Okilaba mapang Dr. Moanungsang, Secretary, Literature & Education, ABAM ajanga iba sentong ya raksa aliba yangluba ka masü saka alima yimya khenyongi balaka aoba mapang asenok kati ka meteta alitsüji tongtibang, ta angateta ayonger, aser iba sentong ya ABAM-i ABAM

chirtem aliba tesem tonga arua moatsütsü atema sarasadema ayonger, ta shisem.

Rev. Dr. Prof. Mar Pongener, Executive Secretary, ABAM ajanga Tsüngi O ashiba mapang, Tsüngremi asen Aor kanga aochia asenok leptep tsüngtep mapang, Khristan Yimsü arua taochi angur rongnung densem, ta ashi. Iba sülen maneni Pa wadang tejakleni oa talisa kiyonger kin 7 dangi osang tajung bener ao ano Arunachal nung kin asem den tenyaba mapa inyak. Yamaji lenmang aisünung ABAM-i Tsüngrem mapa inyakbatem lir. Tanü lanu Putu nunga parnok den iba mapa tajung inyaka aotsü mapang ka arur anungji lanurtemi tsürabur mapang inyakba mapa mamai inyaktsü

bilema liang ta pai ashi.

Paisa ano ABAM ajanga Aor Laishirtem tezüngdak asoshi teyari küm nung sen lakh metsü (20 Lakhs) nüngdaka alir noklang ka nem (100) agüja aruba ya Pa tenzükbang nung arok külem shilem, ta tasü ita tenzüksü mera agir asünung tasü itta züngang, ta ashi.

Maneni paisa Laishirtem dang ABAM ji kechiar meteta alitsü aser tetsü oshi meima jembitsü tamatok, ta ayongzük. Tongtipangsa pai ashiba kaji, Laishir ka asüba yabo Tsüngrem den tenangzüktepba tulu akaba nübo asünung, shisatsü bushiba den tamang sarasadem aser lai angatetren akhanga alitsüla, ta ashi. Aji mesüra tanü tensa Yisui maliba Arogotema aika tenteta aoba

nung shilem agiatoker rongnung densem doktsü, anungji Yisui chichia akaba taküm aser tenzüker kaka asütsü merangang, ta ajungshi.

Laishirtem nungi Mr. Chubayanger NBC aser Mr. Longjenjang CTC ajanga jembia liasü aser iba mapang ABAM-i teyari agütsüba atema pelaba den iba sentong ayongba ajanga tanü Laishirtem tsüngda tesendaktep tali akhangshir aser iba tesendaktep kodanga mesamatsü, ta pelaba shisem.

Dr. Sentila Principal NBC ajanga jembiba mapang nung NBC college lapoker küm 46 buba nung tsürapuri techirtem bushi ama ABAM-i iba sentong ayongba ngua Tsüngremi asen Aortem semdang ta angateter, ta ashi. Laisa ano

Arogo aser Laibushiba tesem külemi tesendaktep lia aoba ajanga tanelar khuret tali angateta inyaktsü alinung maneni telungjem akatsüla, ta shisem.

Rev. Dr. Prof. Temjen Jamir, Principal CTC ajanga iba sentong akaba ajanga Laishirtem tia tensa balala nungi tajaba lia lai bushidang tenangzükba akangshia aziüoka tanela leniba nung aotsü mera agiba lir, ta shisem. Iba den tesayurtem asoshia iba sentong ajanga bendanga agüja khuret akaba tesayur kaka asütsü mera lir ta pelaba o shisem. Paisa Laishirtem dang tenzüksü asoshi Pa sentong angateta tajaba tejangja meteter süang ta ashi.

Sentong nung NBC aser CTC laishirtemi "Mera tasen" aser "Khrista Sangwa Yalokjang" ken tajung tena telok ayongzük.

Tang tezüngdakpur NBC nung Aor 26 aser CTC nung 204 lir. Parnok den Aor tesayurtem ajak arua iba sentong nung aden. Iba sentong Mrs. Alemla Mozür Secretary, ABAM WM-i ani aser tatem nung Rev. L. Yapang Mollier, Secretary, Church & Mission, ABAM ajanga Aor Laishirtem aser Tesayurtem asoshi bendanga agüja sarasadema sentong tembang.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rendang**

(v) longa longa lepdang ( cutting off in circular motion)

\* Kübui süng tuluka nok agi **rendang**.

**Rendi**

(adj) Yimkong, aika ( entire community, large number)

\* Par rongsen agi **rendi** lema chiyongdaksü.

**OLONG PAITEP # 6568**

	1				2	3			
4			5						6
						7			
	8								
	9			10				11	
						12			13
14									
						15			

**TIPIEN**

- 2. Süjeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

**LANGTSÜNGLEN**

- 1. \_\_\_\_\_ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. \_\_\_\_\_ kibur - (5)
- 13. Tebur tembar tsüngda jatepba - (4)

**OLONG PAITEP # 6567 TELANGZÜBA**

**TIPIEN :**

- 1. Semtu, 3. Lepko, 5. Bilem,
- 8. Ulu, 10. Tsünpang,
- 11. Tesangwa, 13. Aoksa,
- 15. Putir, 16. Yipru.

**LANGTSÜNGLEN :**

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.



**KIYONGER KA ALOKBAR KIDANGI ARUR :**

- Kiyonger** : Tebo, nutsü o nübu na lir mali?
- Alokba** : Tenaprong bazaar-i ogoto, langka nüngdak aliana? Na langka aginüra ni kübu dangi text asüjato.
- Kiyonger** : Masü, ni nübu dang langka shinürba aja.
- Alokba** : Odang shiangkoto, parnok arur ni ashitsüato.
- Kiyonger** : Ina, ozü jala to nüdi tambusangi tanur benlokjaa lirja! Ibaji jembinerba.
- Alokba** : O ajibo ni ashitsü makoka, ozü ak pijenbaji Rs.2000/- agir, nashi pongjibai pijenbaji Rs.5000/- agir, saka nisung pijenbajibo kwiang agijar kübu denang jembiang no!
- Kiyonger** : Oh Alokba!!

~ Lilir : WhatsApp

**Manipur: Internet lapoktsütsü akhangba SC-i magizük**



**New Delhi, Chiteni/July 6**

(Agencies): Manipur nung internet shibangtsür aliba anema ken o benokba angadangtsü atema Brehostibarnü Supreme Court-i memulungi liasü.

Ken o angadangtsü magizükba mapang Supreme Court-i ashiba agi, Manipur High court-i iba ken o ya dang asadangba mapang lir.

CJI DY Chandrachud aser justices PS Narasimha o Manoj Mishra nunger i kümtetba Supreme Court bench kati iba ken o magizüki liasü.

"Nenoki kechiba high court dangi mabener? Kechiyong onoki tetuyuba agütsüba mapang nungi high court-i iba ken o ya merprangtsü," ta

Supreme Court bench-i advocate Shadan Farasat dang ashi, shiba ken o benokertem tenüng nung nokdaka liasü.

Internet shibangja aliba lapoktsütsü atema takhangba agüja ken o ya Manipur nung alir, lawyer Victor Singh aser shishilembar Mayengbam James nati Supreme court nung benoka liasü.

Temetetsü kaji Manipur high court-i taoba ita state nung Biren Singh-i aniba BJP sorkar dang iba mepetmesü adoker aliba state nung tesem kar nung internet service lapoktsütsü atema tetuyuba agüja liasü.

Manipur high court-i state sorkar dang tesem kar nung lisopurtem nem internet service

tatazkük ka agütsütsü asoshi tetuyuba agütsü.

Iba tetuyuba ya public interest litigations (PILs) kar angadanga mapang Manipur high court nungi justices Ahanthem Bimol Singh aser A Guneswar Sharma nati agüja liasü.

State nung internet service nokdanga aliba lapoktsütsü khanga PIL tem ya Manipur high court nung benoka liasü.

"Nüburtem kangshitepba aser talisa kaketshirtem dang admission agiba mapang aser nüburtem tang jongdak nüngdakterem atalokdaksütsü asoshi temulungdang yur state ketdangtsürtem dang parnok tawabanga kübok tesem kar nung internet service tatazkük ka agütsütsü asoshi tuyur," ta Manipur high court tetuyuba nung shia lir.

May 3 nü Manipur sorkari mezüngbuba state nung internet service shibangtsü, kong broadband densema lir.

Manipur nung kin ana tsüngda mangatettep adokba sülen May 3 nü nungi tenzüka mepetmesü tulu adoker lir.

Iba azütokshi lendong nung nisung 150 shi taküm samaogo aser nisung meyrejang aika pei talidak ki toktsür jenshiaogo.

**Power junga agütsütsü atema sorkari inyakdar: CM Sangma**

**Shillong, Chiteni/July 6** (Agencies): State nung power supply tajungba agütsütsü atema Meghalaya sorkari takokba tashi inyakdar.

Iba olen ya Meghalaya chief minister Conrad Sangma-i Brehostibarnü lemsatepa liasü.

Power mapashia shibangba indang jembiba mapang Meghalaya CM Conrad Sangma-i, state sorkari state nung power agi anüingba ken o bentetsü atema takokba tashi jenjang agidar, ta ashi.

Tzünglu peria maruba aser state kübok tesem balala nung ayongertem nung tzü kanga ajemba ayimba ajanga state indang hydro-power unit tem nung kongshiogo aser iba ajanga power agi anünger.

Temetetsü kaji, Meghalaya nung electricity adokdaksütsü atema hydro-power unit tem dak metaloker alir.

"Lenmang balala ajanga electricity madokdaksüra tarutsü nung power agütsütsü



Conrad Sangma

atema tasak asütsü, anungji iba ya tebenja teblemtsü ka lir, saka onoki tajungba küma yanglushitsü atema inyakdar," ta Meghalaya CM Conrad Sangma-i Shillong nung ashi.

Meghalaya CM-i ashiba agi, state nung küm shia power unit million 1700 nüngdaker.

Ajisüaka Meghalaya-i küm nung unit 1000 mesüra 1100 shi

dang adokdaksür aser ibayongji 600-700 units shi agi anünger.

"Power agi anüingba ya central agencies nungi share anguba agi mesemer aser tanungbaji shishilembadak nungi alir. Asenoki iba tia ajangshidar. Power nüngdakba dang nungi shilem 30 agi tajemba lir," ta Meghalaya chief minister-i ashi.

**Assam nung Adivasi telungpur 1100 bendanga agütsü**

**Guwahati, Chiteni/July 6** (Agencies): Assam nung Adivasi telungpur telok pongu nungi züngsem 1100 shi Brehostibarnü Guwahati nung sentong ka ayongzüka agiba mapang bendanga agütsüogo.

Adivasi nunger telungpur telok pongu nungi züngsemtem yagi Srimanta Sankardev Kalakshetra, Guwahati nung bendanga agütsüba sentong ayongzüka

agiba mapang Assam chief minister Himanta Biswa Sarma matsünga bendanga agüja liasü.

Brehostibarnü bendanga agütsüba telungpurtem ya All Adivasi National Liberation Army (AANLA), Birsas Commando Force (BCF), Santhal Tiger Force (STF), Adivasi Cobra Militant Assam (ACMA) aser Adivasi People's Army (APA) nungi

züngsemtem liasü.

Prangbong hadir balala bendanga agütsüba sentong nung tongtibang minister tem aser police ketdangtsürtem densema liasü.

Prangbong hadir bendanga agütsüba sentong agiba sülen Adivasi welfare aser development council ketdangpurtem tenangzüktepba agiba sentong ayongzüka agia liasü.

# Wagner tekolakba Prigozhin Russia nung lir

**Minsk, Chiteni/July 06 (Agencies):** Taoba ita Russia nung sorkar anema mapang tatsüka nokdaksang Wagner tekolakba Yevgeny Prigozhin Belarus nung masü Russia nung lir, ta Belarus leniri ashi.

Wagner sepaitemi Russia lenir anema mapang tatsüka nokdakba sülen Prihozhin kong aliar mejangjai liasü.

Lenirtem anema nokdakba tembangtsü mechi pa anema ken o benoka aliba agien aser Belarus-i aotsü maongka agütsü.

Saka Brehostibarnü Belarus lenir Alexander Lukashenko ashiba agi, "Prigozhin St Petersburg nung lir. Pa Belarus nung mali."

Wager sepaitemi linük lenir anema nokdakba tembangtsü mechi Lukashenko tetsüngtai ia tezüngzüktep yanglua liasü aser hopta ka tejakdang Prigozhin ya Belarus-i aru.

BBC ajanga Prigozhin meyong tayimtsü tsüngsü apuba nung June ita tatemlen Belarus-i aru aser kasa nikongdang Russia-i ao.

Iba sülen St Petersburg aser Moscow tsüngta ishíben senzüogo, ajisüaka tayimtsü

nungya Prigozhin mena ali maliar mejangja.

Tanünga Wagner sepaitemi parnok indang bases nung lir, ta Lukashenko-i Brehostibarnü ashi - anungji ibai Ukraine anüdoklen mesüra Russia indang Krasnodar region nung training base densema alitsü akok.

Wagner züngsem kar Belarus nung alitsü maongka agütsüba tang tashi lir aser parnok amshitsü asoshi Soviet mapang mitkar temi amshiba tesem kar agüja lir, ta Belarus leniri ashi.

Iba sentong yagi kidanger NATO linüktem saksalemdaktsü.

"Saka Wagner mangdang balaka lir. Ni ajibo mashitsü. Tang tashi parnok alitsü indang telemtetba tatem kati maru," ta pai ashi.

Lukashenko, shibai 1994 nungi Belarus nung yimsü süa arur aser pa tashi nung alitsü atema 2020 election nung tim masüba mapa inyak ta aikati temolung melemer, pai Wagner sepaitem Belarus nung arua aliba nung lendong mangur aser par linük anema kodanga menokdaktsü ta amanger, ta

ashi. Wagner Group ya sen yong raraba jurila army tem lir aser Ukraine nung Russian army den külemi rara arur.

Prigozhin-i Russian lenirtem anema nokdakba mapang Wagner sepaitem Ukraine nung field camps nungi Russia south tsütsü Rostov-on-Don telungi aita yangji sepaitem indang tesem kar rakzüka liasü.

Iba sülen Wagner sepaitem north tsütsü Moscow leni ao, anungji Kremlin-i linük yimtiba densema region aika nung security akangshi.

Russia Tir Vladimir Putin-i mapang tatsüka lir, Wagner sepaitemi anema nokdakba mapang Russian pilots tem asü, ta ashi aser iba yongji tayimtsü kar raksaba amai ajiteter.

Mezüngbo Putin-i iba telok yagi linük ashioktsü ta shia liasü, saka tezüngzüktep agiba kübok Prigozhin kumzüka ayutsü nangzük aser Wagner anema benoka aliba criminal case agien.

Wagner sepaitem dang regular army contract züluteptsü, kidangi aotsü mesüra Belarus-i aotsü shia liasü.

# South Africa nung gas leak ajanga nisung 17 asü

**Johannesburg, Chiteni/July 06 (Agencies):** South Africa nung nitrate oxide gas leak ajanga nisung 17 asü südi, ta yangji aliba ketdangsür temi ashi.

Asürtem ronung tetsür aser tanurtem densema lir aser parnok ya Johannesburg anüdoklen Boksburg nung aliba informal settlement ka nung gas saoker asü.

Bodhbarnü iba gas leak ya yangji ozüing alema hon atoba den sendaktepa lir.

Hon atoba tesemtem mamshi alidak nungi ali ayuar hon agizüktsü asoshi ozüing alema hon ator temi nitrate oxide gas ya amshir, koba dang

parnoki zama zamas ta ajar. Boksburg kübok kanga mesütepa aliba Angelo jila nung gas cylinders tem rongnung ka nungi iba tango adokba ngutet. Iba tesem temeket metre 100 telungzük nung asürtem ya liasü.

Nisung tasümgang tali ngutettsü akok, kechiaser search and rescue team tem maneni inyaktar, ta emergency services ketdangsür temi ashi.

Nisung 15 mozüki nung anepaluba mapang lir aser item rongnung nisung asem kumzüktsü teimla kangabo mali.

South Africa nung alir Mozambican tsür kati

osangbener dang ashiba agi, la kinungbo iba gas leak nung süogo. Kidanger ka nungi küdangi call aru aser kü kinungbo ali nung laoba indang metetdaksü, ta lai ashi.

Kü kinungbo tasümgang Mozambique-i bener arutsü shisabolur, kechiaser ni mapa meinyaker aser pa handyman ama part-time mapa inyaka liasü, ta lai nüktzü yima ashi.

Kasa jila nung Christmas mapang gas tanker ka poka nisung 41 takum agiba sülen tang iba lendong ya ajurur.

# Israel-i Lebanon nung rocket khaloktsüdak amak

**Jerusalem, Chiteni/July 06 (Agencies):** Lebanon nung tesem ka nungi arütsü alema rocket khaloktsüdak Israel sepaitemi amak, ta mitkar temi ashi.

Sangdong ka ajanga ashiba agi, Lebanon nungi Brehostibarnep rocket ka khalokja Israel territory nung tsük.

"Iba telangzüba agüja IDF (Israeli military) ajanga Lebanese territory nungi rocket khaloktsüdak tang temakdak lir," ta ministry sangdong ka ajanga ashi.

Israel tsütsü arütsülen temolung melemtettsüsa inyaksangshiba nguteta mali, ta mitkar temi sangdong ka nung shia liasü.

Lebanon indang state news agency ANI ajanga

ashiba agi, Israel-i artillery shells 15 dang tali khaloktsü aser Kfar Chouba aser Halta nungertem aliba tesem anasa kongshi.

Rocket khaloktsüba atema tang tashi tenüing agir mali aser Lebanese army nungia telangzüba agüja mali.

Lebanon nungi osangtem ajanga ashiba agi, rocket ka Lebanon arütsülen aliba Wazzani yimtsüng nung tsük aser tanabuba rocket ya mangatetep aliba Ghajar yimtsüng anasa tsük.

Ghonda ishika lir ano occupied West Bank nung illegal Israeli settlement anasa khatap, ta Israel mitkar temi ashi. Nisung ka kanga sashia yiru, ta emergency services ajanga ashi.

(Maneni tapak 8 nung...)

## DIMAPUR YAONGYIMSEN LONGKÜM SAYIR KIDONG

Dimapur : Nagaland

### TENÜNGSANG TETUSHI AGÜTSÜR



Wb. Odikokba Longkumer aser Wt. Moasenla Imsong, tena jala Kr. WANGSHIRENLA-i Bsc, Computer Science (honour) examination 2023 nung Gold Medal takok konang ngutetba asoshi Yaongyimsen Longküm Sayir Kidong telongjem aser Elangtsür telongjem-i tepela tetushi agütsür.

Tarutsü anogotem nunga ne taküm aser wadang ajak nung Tsüngremi maneni dang azükurua temoatsü nung len aniangma ta sarasademtsür.

Sd/-  
Wb. S. ALEM LKR.  
President

Sd/-  
Dr. LONGERONEN LKR.  
Secretary



### Office of the LION'S CLUB LONGSA

#### Konang Tetushi Agütsür

Wb. Toshilemba aser Wt. Takolemla na jabaso Sb. Yangersenba T. Jamir, NPSC tatidang nung Lecture in Mathematics (Under Technical Education) jenjang nguteta asen Club nem konang tetushi bener arutsüba asoshitenüngsang aser tetushi agütsür.



Asen teyanglur Tsüngremi ne taküm aser wadang ajak nung maneni takokba moajangma ta sarasademtsür.

Sd/-  
Nungsangtemshi  
President

Sd/-  
Temsutoshi  
Secretary

### Office of the MOKOKCHUNG TOWN LONGSA KAKETSHIR TELONGJEM

#### TENÜNGSANG AGÜTSÜR

Wb. Toshilemba aser Wt. Takolemla tena jabaso Sb. Yangersenba T. Jamir-i NPSC 2022 tatidang nung Lecturer in Mathematics (under Technical Education) jenjang ngutetba den ano Wb. Moyalepden Longkumer aser Wt. Yashimongla Jamir tena jala Kr. Imtiyala Longkumer-i NPSC 2022 tatidang nung Post Graduate Teacher in English (under School Education) jenjang nguteta asen kaketshir nem konang bener arütsüba asoshi Mokokchung Town Longsa Kaketshir Telongjem ajanga tenüngsang tulu agütsür aser pelaba lemsateper.

Tsüngremi nenaprongla tarutsü wadang ajak nung maneni maojangma.

Sd/-  
Lendilong Longkumer  
President, MTLKT

Sd/-  
Aosenla L Pongen  
Gen. Secretary, MTLKT

## Mokokchung Law College

ADMISSION OPEN FOR 2023-2024

Affordable Fee Structure  
Moot Court  
Established Library

L.L.B.

Admission Requirements

• Minimum BA or Equivalent  
50% for General  
And 40% for ST

Ph: 9436006253/9856386557  
MkgLawcollege@gmail.com



### PSG-i Marco Asensio den tenangzüktepba yangluogo



**Chiteni/July 6, 2023**  
**(Agencies):** Paris Saint-Germain-i, Marco Asensio den tenangzüktepba ka yangluba Brehostibarnü metetdaksüogo. Spain nunger forward nung iba Parisian club den küm asem atema tenangzüktepba ka yangluogo aser pa iba club nungi 2026 küm June ita tashi asayatsü.

densemaba ya maongka tulu ka lir," ta Marco Asensio-i PSG den adenba sülen ashi. "Ni teammate tasentem den adentsü aser nükjidong kar ajangzüksü asoshi parnok den longjemer inyaksü yongya atar," ta pai shisem. RCD Mallorca youth academy nungi anitetba sülen Marco Asensio mezüngbuba 2013/14 season nung first-team

nungi asaya liasü. 2015 küm summer nung Real Madrid nung adenba sülen pa RCD Espanyol-i loan nung yok, kong pai asaya 37 nung goal pezü idakja liasü. Iba club nungi mezüngbuba asayaba mapang pai goal ana idaktsü aser assist ka süja liasü. Iba sülen Marco Asensio Madrid-i meyipa aru aser season tenet asayaba mapang pai La Liga titles asem (2017, 2020, 2022), Spanish Super Cups (2017 & 2020) ana, Champions Leagues (2017, 2018, 2022) asem, Club World Cups (2016, 2017, 2018 and 2022) pezü, UEFA Super Cups (2016, 2017 and 2022) asem aser Copa del Rey (2023) ka kokogo. Asensio ya Spain team nungi asayatsü atema mezüngbuba 2016 küm May ita shima liasü aser pa Julen Lopetegui indang 2018 World Cup squad nung densema liasü. Küm pezü sülen ano Marco Asensio tanabuba World Cup nung asaya aser iba mapang pai goal ka idakja liasü.

### Chennaiyin FC-i Prateek Singh aser Sachu Siby na alizükogo

**Chiteni/July 6, 2023**  
**(Agencies):** Chennaiyin FC-i Brehostibarnü sangdong ka ajanga taruba season metenzük tsüingda team defence akangshitsü atema goalkeeper Prateek Kumar Singh aser defender Sachu Siby na den tenangzüktepba yangluba sangdongogo. Lanur asayar anaprongla tang mezüngbuba Indian Super League (ISL) nung asayatsü lir. Tenaprongla domestic asaya nung kanga junga asayaogo aser tenai tena dak sempet tajung keta aliba aser tarutsü

nungi junga asayayonga aotsü lenmang sadema lapoka aliba sayuogo. Chandigarh nung soa ainsang Prateek ya Raman Vijayan Soccer School nungi anitetba asayar ka lir aser pa youth jenjang nung AKT nungi asayaogo. Arishi küm 23 tain asayar ya pa indang professional career Chennai City FC nung 2019 küm tenzük aser tang tashi nung asaya 15 nung shilem agiogo. "Ni Chennaiyin FC nung wdang tasen ka tenzüksü atema yongya atar. Ni

teammate tasentem aser fan tem den season tepeyong jangradema asayatsü yongya atar," ta Prateek-i ashi. Kasa mapang nung Defender Siby-i 2022-23 Kerala Premier League nung kanga junga asayaogo, kong Kerala United-i tite abenba nung pai tongtibang shilem agia liasü. Chennaiyin FC puri taruba season atema squad akangshitsü asoshi defender Ankit Mukherjee aser Bijay Chhetri na alizükba sülen Siby ya club-i alizükba defender tasembuba kümogo.

### Tamim Iqbal-i pa cricket asaya nungi anenba sangdongogo



**New Delhi, Chiteni/July 6**  
**(Agencies):** Bangladesh team India nung ODI World Cup campaign tenzüksü ita asem anunga lia captain Tamim Iqbal-i Brehostibarnü pa international cricket asaya nungi anentsü atema telemtetba agiba sangdongogo. Küm 16 asayaba sülen arishi küm 34 tain asayar yagi pa asaya nungi anentsü atema telemtetba agiba indang Dhaka nung osangbenertem den sensaksemba mapang sangdonga liasü. "Yashi Afghanistan den asaya

tu ni atema tatembangbuba international asaya liasü. Ni international cricket asaya nungi anener," ta Tamim-i osangbenertem dang ashi. "Iba ya ni atema tatembang lir," ta Tamim-i ashi, shiba 2007 küm Harare nung Zimbabwe den asayaba mapang international asaya nung mezüngbuba asaya liasü. "Ni takokba tashi tajungtiba agütsüogo aser takokba tashi merandangogo. Ni international cricket asaya nungi anener," ta pai ashi. Bangladeshi team World

Cup nung mezüngbuba asaya Ocoober 7 nü Afghanistan den Dharamsala nung asayatsü lir aser Tamim asaya nungi anenba sülen shiba lenisüba nung iba WC asayatsü iba indang osang kecha agüja mali. Left-handed opener Tamim-i international cricket asaya nung run 15,000 dak tema yangluogo, kong century 25 yangluba densema lir. Pai ODI asaya nung run 8,313 yanglua lir, koba Bangladesh nunger batsmen tem ajak rongnung timtiba asütsü. Paisa ODI nung century 14 yangluogo, koba Bangladesh nunger asayartem ajak rongnungi timtiba lir. Tamim-i Bodhbarnü Afghanistan den Chattogram nung one-day international asayaba mapang run 13 yanglu koba pa asoshi international asaya tatembangbuba liasü.

### 2buba Tening Town Inter ward League tembangogo

**Dimapur, Chiteni/July 6**  
**(TYO):** 2buba Tening Town Interward League june 17 nü tenzük aser July 6 nü tembangogo. Iba asayamung nung tebur football aser volleyball asaya liasü. Asayamung shibangba sentong nung EAC Tening, Imliwabang Aier, NCS alakteta jaoker liasü. Sentong nung Imliwabang-i, lokti nung terenlok aser yimjiyimjung bener aotsü atema lenla ajak nung ka küma longjemtsü ajungshiba den

talisa lokti nung temelenshi bener arutsü atema lanurtem longjemtsü nüngdakba lemsatapa liasü. Asayamung shibangba sentong nung Bendiang Rentta Youth Pastor, Town Baptist Church Tening-i Tsüngrem temaotsü meshizüka sarasadem aser Tening Town Youth Organisation tir, Kaibakam-i tepela o jembia liasü. Iba sentong ya General Secretary Tening Town Youth Organization, Wiridin Ngamta lenisüba nung agia liasü.

### Canada Open: Sindhu aser Sen na tanabuba round-i iogo



**Chiteni/July 6, 2023**  
**(Agencies):** Tang asaya aliba BWF World Tour Super 500 event, Canada Open nung pei tata asaya akokba sülen India nunger asayar PV Sindhu aser Lakshya Sen na pre-quarterfinals-i iogo. Sindhu shiba iba asayamung nung seed pezübuba lir lai Bodhbarnü iba asayamung tetsür kija asaya mezüngbuba round nung Canada tsür Talia NG 21-16 21-9 agi ayong ayonga koka liasü. Sindhu yiruba sülen tawa nung masayateti arudar aser lai taküm asayamung ka nung dang final tonga asaya lir aser asayamung timba ka nung mezüngbuba mesüra tanabuba round nung dang tsüka liasü. Kasa mapang nung tebur kija asaya nung Sen-i kanga meranga asayar Thailand nung second seed asayar Kunlavut Vitidsarn 21-18 21-15 agi koka liasü. Olympic nung medal ana

tashi ngur alila Sindhu taruba round nung Japan tsür Natsuki Nidaira den asayatsü aser Sen Brazil nunger Ygor Coelho den asayatsü. Ajisüaka B Sai Praneeth bo mezüngbuba round nung tsükatokogo. Pa Coelho-i 12-21 17-21 agi koka liasü. Maneni India nunger tetsür kija asaya Ruthvika Shivani Gadde-a mezüngbuba round nung tsükogo. La Thailand tsür Supanida Katethong-i 12-21 3-21 agi tsükdakja liasü. India nunger asayartem rongnungi iba asayamung nung Sindhu, Sen aser tebur tarep asayar Krishna Prasad Garaga aser Vishnuvardhan Goud Panjala nunger ajak tanabuba round nung asayaba angutsü. Krishna aser Vishnuvardhan na tanabuba round nung Indonesia nunger second seeded tarep Mohammad Ahsan aser Hendra Setiawan na den asayatsü.

### Israel-i Lebanon nung rocket... (Tapak 7 nungi...)

Southern Lebanon nung aliba United Nations indang peacekeeping forces ajanga ajak dang aremzükteptsü aser tensa tamajungba mekumdaktsütsü ajungshi. Occupied West Bank kübok Palestine nunger refugee camp Jenin nung Israel mitkar temi operation tesashi ka agiba tembangba sülen rocket khaloktsüba ya ataloker. Iran-i yariba Lebanese telok aser tashi tulu aliba Hezbollah, shirnoki southern Lebanon amokbanga lir aser Israel den rara aika rara arua lir, parnoki Israeli operation mapang Palestine nunger bukuma osang

sangdonga liasü. Ajisüaka rocket khaloktsüba atema Hezbollah nungi sangdong kecha agüja mali. Parnoki sangdong ka nung, Israel sepaitemi Ghajar north tsütsü lendong aketba mera agiba aija liasü, koba Lebanon-i par indang ama züngshir. Israel-i yinzü amshia atsü atsür aser cement jara yanglur, ta Hezbollah-i aitsür. April ita nunga Lebanon tsütsü nungi Israel nung rocket khaloktsüba atema Israel-i Palestine nunger Hamas telok dak tai tongloktsü aser iba sülen Israel-i Lebanon nung tesem kar amak.

**BILEMDANGANG**  
**"O khen jembizüka yokra meyipa agitsü tamakoktsü."**